

Korosê **Pawre kot Koros kamã Jejus kôt** **hkwýjê hwýr kagà nê mēnh**

Pawre na pre kagàja nhîpêx. Jejus nhỹ hã hkrajê jahkre o mē pa xwýnhjê hõ na pre. Tã nhũm mē kêp Jejus kra hkêt xwýnh kwýjaja Jejus ã unê nê haxà nhũm arĩ hkrĩ ho hkrĩ. Hãmri nê krĩ pê Koros kamã Jejus krajê mã kagà nhîpêx nê mē hwýr kumê. Koros kamã Jejus kwýjê kamã Ijaew kwý nê kamã Ijaew kêt xwýnh kwý nhũm Pawre mē ho hpmiràatã mē hwýr kumê. Kormã mē hwýr mör nê mē omunh kêt tãã. Nê kagàja kamã mē kot tanhmã Jejus o hêx to ho pa xwýnhjê jarēnh to. Jejus kêp Tirtũm Kra hkêt ã mē kot ho hêx xwýnhjê jarē nê mē nê mē kãm kapêr. Mē kot mē hkôt amnhĩ nhîpêx kêt kaxyw mē kãm kapêr nê hã kagà nê mē hwýr kumê nê mē kãm:

¹ Pa Koros kamã Kris kôt ixkwýjaja. Xà mē amex na ka mē apa? Ixpê Pawre na pa mē awýr kagàja nhîpêx nê mē awýr kumê. Kris kôt mē pahtõ Ximotre mē wa kumê. Ixte Jejus Kris nhỹ hã mē ahkre ho mē ixpa xwýnhjê hõ na pa. Tirtũm kãm hprãm xà hkôt.

² Tã pa mē awýr kagà nhîpêx nê kumê. Mē apê Kris kôt mē ixtõ nê ixtõx na ka mē. Na ka xep htem Kris kapêr kôt amnhĩ nhîpêx mex o ri apa. E kê Tirtũm mē apê hkra hã mē akutã nojarêt rãhã nê. Ka mē amex nê ajamakêtkati nê axàmnhĩx ri tanhmã amnhĩ nhîpêx ho ri apa.

Koros nhõ xwỳnh kwỳjaja kot Jejus kôt amnhĩ xunhwỳr ã mẽ harênh

Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nẽ hkôt amnhĩ nhĩpêx mex o apa hã mẽ ajarênhja ma. Nẽ mẽ kot Tĩrtũm kôt amnhĩ xunhwỳr xwỳnh piitã mẽ amã mẽ hkĩnh ã mẽ ho mex o apa hã mẽ ajarênhja ma nẽ wa ixkĩnh nẽ. Jakamã na pa wa Pahihti Jejus Nhĩpêxà Tĩrtũm mã amnhĩ jarênh kaxyw nẽ kãm mẽ anhy hã wa ixkĩnh ã amnhĩ jarẽ.

⁵ Na pre Epas ma mẽ awỳr mỗ nẽ mẽ amã Jejus kot tanhmã mẽ panê amnhĩ nhĩpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nẽ amnhĩ kaxyw hkôt ajamaxpêr nẽ hkôt amnhĩ xunhwỳ. Hãmri nẽ amnhĩ wỳr Jejus jamãr o ri apa. Kojã nhỹrmã akupỹn mẽ pahwỳr wrỳ nẽ amnhĩ pyrà nẽ ma akupỹm kaxkwa hwỳr mẽ pahto api nẽ mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamaxpêr tỳx nẽ ã kot amnhĩ nhĩpêx anhyr kutêp amnhĩ wỳr kamã ajamak rãhã nẽ. Nẽ mẽ amã mẽ kot Tĩrtũm kôt amnhĩ xunhwỳr xwỳnhjê hkĩnh tỳx nẽ.

⁶ Na hte Tĩrtũm ãm hãmri mẽ pahto mex pix rãhã ho pa. Nẽ mẽmoj to mẽ pakutã nojarêr rãhã nẽ. Tã wam mẽ ate harênh marta ã ka mẽ hkôt amnhĩ xunhwỳr kurê kumrêx nẽ ri kapêr kôt axpên kôt amnhĩ nhĩpêx mex pix o ri apa. Jao hkôt pix mã amnhĩ nhĩpêx mex nẽ. Tã na hte pika piitã hkôt ri mẽ pa xwỳnh kwỳjaja mẽ apyrã nẽ Jejus jarênh ma nẽ hkôt amnhĩ xunhwỳ. Nẽ mẽ apyrã nẽ axtem

hkôt pix mã amnhĩ nhĩpêx nê kapêr kôt amnhĩ nhĩpêx mex o ri pa.

⁷ Nê mẽ awỳr mōrta ã na pre Epasja mẽ amã Tĩrtũm kapêr jarênh o ri mẽ akôt pa ka prem ama nê amnhĩ kaxyw hkôt ajamaxpêr nê hkôt amnhĩ xunhwỳ. Epasja wa ixpyrà nê kot Kris mã tanhmã amnhĩ nhĩpêx to ho pa xwỳnh. Nê wa inhmã hapêê. Na pre katàt kôt mẽ amã Tĩrtũm kapêr jarênh pa. Kot mẽmoj to mẽ pakutã nojarêr rãhã hã harênh o ri mẽ akôt pa.

⁸ Tã man akupỹn wa ixwỳr mōn pōj nê wa inhmã tanhmã mẽ ajarênh to. Tĩrtũm Karō nhỹ hã mẽ amã Kris kôt atō nê atōx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tỳx kumrêx.

Pawre mẽ Ximotre wa kot Koros kãm hkwỳjê ho Tĩrtũm wỳr ã wa harênh

Epas 1.15-23, 3.14-21; Piripos 1.9; Wam Tesarōn 5.23-24; Sikũn Tesarōn 1.11, 2.16

⁹ Nê na pre Epas akupỹn wa ixwỳr pōj nê wa inhmã tanhmã mẽ ajarênh to. Mẽ ate amnhĩ kaxyw Jesus kôt ajamaxpêr o apa nê mẽ amã Kris kôt akwỳjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tĩrtũm wỳr rãhã o jar mẽ haghjênh xà kamã ixkrĩ. Nê arĩ mẽ ato hwỳr rãhã ho ixkrĩ. Nê mẽ ato hwỳr o:

—Pa Tĩrtũm. Ot pa Ximotre mẽ wa Korosê nhõ xwỳnhjê ho awỳr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarō nhỹ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tĩrtũm wỳr anhỳr rãhã ho ixkrĩ. Kot kaj mẽ ã amnhĩ nhĩpêx anhỳr o ri apa nẽ Jejus kot amnhĩ nhĩpêx o amnhĩ nhĩpêx mex o ri apa. Nẽ aprĩ hã Tĩrtũm kot amnhĩ nhĩpêx ã omunh mex o mõi. Jao mẽmoj to axpẽn kutã anojarêt pix o ri apa hprãm. Hãmri nhũm Tĩrtũm ja hã mẽ apumu nẽ hkĩnh nẽ.

¹¹ Tĩrtũmja mẽ pakurom mẽmoj piitã kaxyw àhpumunh o àhpumunh. Nẽ mẽmoj piitã kaxyw hihtỳx o hihtỳx. Jakamã na pa hte wa mẽ ato hwỳr o:

—Pa Tĩrtũm. Kwa tanhmã Koros nhõ xwỳnhjê ho kê mẽ axihtỳx nhỹ hã mẽmoj punuj kutã amnhĩ to htỳx nẽ. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nẽ ri pa hkêt nẽ. Âm anhỹ hã mẽ hkurê xwỳnhjê kutã amnhĩ to htỳx nẽ hkĩnh kãm ri pa ho pa. Anẽ.

Na pa hte wa ã mẽ ato hwỳr anẽ.

¹² Na pre ra Tĩrtũm amnhĩ ri mẽ pakutêp mẽmoj mex kwỳ jaxwỳ. Mẽ pahpê hkrajê mã haxwỳ. Tã ka mẽ ỹ hã tãm amnhĩ nhĩpêx o apa jao mẽ ate mẽmoj mex jamỳnh mã tãm. Õ krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tĩrtũm mã mex o mex ã harênh rãhã ho ri papa.

¹³ Nẽ Satanasti kêp kamàt kô kamã mẽ kot amnhĩ tomnuj ho mẽ pa xwỳnhjê pãm. Tãm na hte mẽ ho amnhĩptar o pa nẽ hkôt na pu prem amnhĩ nhĩpêx o papa rãhã nhũm Tĩrtũm tee ri ja hã mẽ pahpumu. Hãmri nẽ kãm kêp mẽ papytar prãm xàj mẽ pahwỳr Kra japê htỳx kumrêx xwỳnhja mẽ. Nhũm mẽ pahwỳr wrỳ nẽ mẽ panê htyk o mẽ

pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwỳ nhũm Tĩrtũm hã mẽ pahpumu nẽ mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyræk. Jao Satanasti pê mẽ pahpytà nhũm hpãnhã Jejusja tãm kêp mẽ pahto amnhĩptàr o pa xwỳnh.

14 Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwỳ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nẽ. ãm Jejus kôt pix mã amnhĩ nhĩpêx o ri papa.

Kris mẽ Tĩrtũm wa kot amnhĩ nhĩpêx te wa kot axpẽn pyræk ã harênh

Juãw 1.1-5; Korosê 2.9; Eprêw 1.1-14

15 Nẽ Krisja te kot Tĩrtũm pyræk. Mẽ pahte pano ho Tĩrtũm pumunh kêt tã Kra Kris kot amnhĩ nhĩpêx ã harênh mar kôt mããnên Tĩrtũm kot amnhĩ nhĩpêx ã omunh mex nẽ. Amnepê mã kormã mẽmoj kêt ri nhũm Jejus pa ho pa rãhã nẽ. Jakamã kot amnhĩ to rax o Tĩrtũm kot mẽmoj to katorja piitã hakrenh par kumrêx.

16 Na pre hipêêxà Tĩrtũm nhỹ hã mẽmoj piitã ho kator pa. Kaxkwa kamã nẽ pika hkôt mẽmoj piitã ho kator pa. Nẽ kaxkwa kamã mẽ pahte pano ho mẽmoj pumunh par xwỳnhjaja nhũm pre ho kato. Nẽ kamã mẽ pahte pano ho mẽmoj pumunh kêt xwỳnhjaja nhũm pre mããnên ho kato. Nẽ kapêr o wryk xwỳnhjaja nẽ mẽ hkrãhtũmjaja nhũm pre mẽ ho kato. Nẽ pika kamã mẽ ho amnhĩptàr xwỳnhjaja nhũm pre mẽ piitã mẽ ho kator pa. Kãm hprãm xà hkôt Tĩrtũm nhỹ hã mẽmoj piitã ho kator pa.

17 Tã na hte arĩ kaxkwa kamã nê pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỹm hapêx pa.

18 Nê tãm na hte mẽ pahpê hkrajê ho amnhĩptâr o pa. Te kêp mẽ pahkrã nhũm te mẽ pahpê ã pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupỹm htĩr o htĩr jakamã kot amnhĩ to rax o mẽmoj piitã hakrenh par.

19 Nê na pre Tĩrtũm ã hamaxpêr anê nê hamaxpêr o: “Nà Ixkra mẽ wa ixte amnhĩ nhĩpêxja te kot axpên pyrãk. Nê wa ixihityx mããnên te kot axpên pyrãk. Nê wa inhmex xà mẽ wa ixãhpumunhja te kot axpên pyrãk. ã wa ixte amnhĩ nhĩpêx kot anhỹr. Wa ixte amnhĩ nhĩpêxja na mex kumrêx.” Anê.

20 Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwỹr xwỹnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwỹr xwỹnhjaja na htem ã amnhĩ nhĩpêx mex anhỹr o pa. ã Jejus kot mẽ panê htyk anhỹr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỹr xwỹnh ã harênh

21 Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwỹ nê pajamaxpêr punuj nê tanhmã amnhĩ tomnuj to pix o ri papa.

22 Tã Jejus kôt amnhĩ xunhwỹ nhũm amnhĩ tã mẽ pahpumu. Hãmri nê ra mẽ panê htyk jakamã

amnhĩ tã mẽ pahpumu nê Tĩrtũm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkêt pyràk o mẽ panhĩpêx nê tãm mẽ paxunhwỳ. Pu mẽ arĩ pahpê Tĩrtũm kutã amnhĩ xunhwỳr xwỳnh kêt nê hpãnhã pahpê hkràmnhwỳy.

²³ Na pre Tĩrtũm mẽ pahte amnhĩ kaxyw Kra Kris kôt pajamaxpêr nê hkôt amnhĩ xunhwỳr ã mẽ pahpumunh kôt ã mẽ pahto mex anê. Tã kêt pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrà nê harênh ma nê hkôt amnhĩ xunhwỳ nê hkôt amnhĩ nhĩpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh
Epes 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htỳx nê pa amnhĩ xà htỳx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhỹr jakamã na pa ixkĩnh nê jar ixkrĩ. Ixte Kris kwỳjê kaxyw amnhĩ xà kamã ijamak tỳx o ixkrĩ. Te mẽ apê Kris nhĩ pyràk xwỳnhjê mãã. Tã pa te ixpê Kris kot amnhĩ nhĩpêx pyràk o mẽ akaxyw amnhĩ xà htỳx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par

nhũm mẽ ate mar nê hkôt amnhĩ nhĩpêx mex o ri apa kaxyw.

²⁶ Na pre kormã mēhõ mẽ awỳr mōr nê mẽ amã harēnh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpẽn pyrāk. Nom na pre amnepê m ri mẽ pa xwỳnhjê mã kormã ja hã amnhĩ to amnhĩrit kêt nê. Tã ra jarãhã mẽ pahpê Kris kwỳjê mã ja ho amnhĩrit. Mããnēn kãm mẽ apê Ijaew kêt xwỳnhjê japê hã amnhĩ to amnhĩrit.

²⁷ Mẽ apê Ijaew kêt tã na ka prem Kris kôt amnhĩ xunhwỳ nhũm Tĩrtũm Karõ mẽ akarõ mã agjê nê mẽ akamã pa ho pa. Ka mẽ ra hkôt amnhĩ nhĩpêx jakamã kot kaj mẽ ixpyrà nê nhỹrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nê mẽ akaxyw ixãm.

²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harēnh kãm ixihỳx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ hagjēnh xà kamã krĩ piitã hwỳr kagà nhĩpêx nê mẽ hwỳr kurê. Mẽ kot kamã harēnh nê mar nê amnhĩ tomnuj kaga nê hpãnhã Kris kôt amnhĩ xunhwỳr nê ãm kôt pix mã amnhĩ nhĩpêx o pa kaxyw. Kêr pa nhỹrmã kãm mẽ ate inhmar nê hkôt amnhĩ xunhwỳr xwỳnhjê jahkre nê kãm:

—E Pahiiti. Ota akwỳjaja. Na htem akôt amnhĩ nhĩpêx mex rãhã ho ri pa. Anê.

²⁹ ã ixte kãm mẽ piitã mẽ harēnh anhỳrja na inhmã hprãm. Ja kaxyw na pre Jejus ixto ixihỳx. Jakamã na pa hte Tĩrtũm nhỹ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm

wÿr o ri ixpa nê mē kām kagà nhîpêx nê mē hwÿr kurê nê kamã kapêr o mē ahkre o ri ixpa.

2

Pawre kot Jejus kapêr o Koros nhõ xwÿnhjê o hihtÿx ã harênh

Epes 3.14-19; Piripos 1.9

¹ E kot paj mē amã tanhmã amnhî jarênh to ka mē inhma. Na pa hte mē ato Tîrtûm wÿr rãhã ho ixkrî. Mē kajaja nê krî pê Ratisej kamã Jejus kôt mē pahkwÿjaja. Kormã ixte mē apumunh kêt tã pa hte mē ato Tîrtûm wÿr kãm ixihtÿx ãhã ho ixkrî.

² Mêmõ kaxyw na pa hte ã mē ato hwÿr anê? Nê mêmõ kaxyw na pa hte mē amã kagà nhîpêx nê mē awÿr kurê? Nã ãm mē ate kamã harênh nê mar nê Jejus kapêr kôt axpên to axihtÿx o ri apa kaxyw. Nê mē amã axpên kînh o ri apa kaxyw. Pê te mē ate ixkre tipxi kamã axpên kôt amnhî nhîpêx o ri apa pyræk. Jao aprî hã Tîrtûm kot amnhî nhîpêx pumunh mex nê amnhî kaxyw hkôt ajamaxpêr tÿx nê. Kot kaj mē ã amnhî nhîpêx anê nê Kris kot amnhî nhîpêxta pumunh pa. Na pre Tîrtûm tokyx mē kãm Kris o amnhîrît kêt tã ra mē pamã ho amnhîrît.

³ Tîrtûm kot amnhî nhîpêx nê kapêrja na pu htem Kris nhÿ hã pahprî hã omunh nê mar mex nê.

⁴ Jakamã koja mêmõjaja mē awÿr mra hãmri nê hêx rom Tîrtûm kapêr kwÿm ri tanhmã mē amã mêmõj jarênh to. Te mē àhpumunh tÿx pyræk o mē amã harê no ãm mē àhpumunh kêt. Ka mē ama nê ãm mē ama nê Kris kaga hkêt nê.

⁵ Nê kormã arĩ Jejus ã ijaxàr nê ixkrĩ nê kormã mẽ akôt ixpa hkêt tã ot pa hte mẽ amã ijamaxpêr rãhã ho ixkrĩ. Nê ra tanhmã mẽ ajarênh mar to. Na ka xep htem Kris kôt amnhĩ nhĩpêx tỳx o ri apa. Te ahkrô pê kukryt mut kuxêêti kot pĩ kupu htỳxta pyràk. Nê ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nê ixkĩnh tỳx nê.

⁶ Na ka prem Pahihti Jejus Kris kôt amnhĩ xunhwỳr pa. Tã kêr ka mẽ arĩ hkôt amnhĩ nhĩpêx mex rãhã ho apa. Kêp mẽ panhõ Pahihti kênã.

⁷ Jakamã mẽ ãm kôt pix mã amnhĩ xunhwỳr tỳx nê aa hkaga hkêt nê. Te mẽmo pĩ hpàr jarêja pika kaxwỳnh kãm pimành nê kot pika jamỳnh tỳxta pyràk. Nhũm kôk xàpêr tỳx tã tee kot mênh kaxyw pyràk. Tã kêr ka mẽ pĩ hpàrta pyrà nê hkôt amnhĩ xunhwỳr tỳx nê hkôt amnhĩ nhĩpêx mex o ri apa. Ra Epas kot mẽ ajahkre ho pa xà hkôt. Nê amnhĩ krãm Kris kapêr jaxàr tỳx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

⁸ Nê kwa kêr ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xàj na htem tanhmã mẽ amã hêx to ho ri mẽ akôt pa. Te amnepêem mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyràk. Hinhu hikôôti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tĩrtũm wa kot amnhĩ nhĩpêx kot axpên pyràk. Nê wa hamaxpêr kot axpên pyràk.

¹⁰ Tã kêr pu mẽ pajaxwỳja wa hamaxpêr o pajamaxpêr nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nê hihtỳx o hihtỳx o kot Tĩrtũm kapêr o mẽ wryk xwỳnhjê piitã mẽ hakrenh par. Nê àhpumunh o àhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhĩpêx o ri apa.

*Mê pahte amnhĩ nhĩpêx nyw jarênh
Rõmãn 6.3; Karatas 5.24*

¹¹ Nê na hte ixkwỳ Ijaewjaja mẽ hkra nhỹrmã hprêk nê Tĩrtũm kôt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwỳnhjaja na pre Kris mẽ anhĩpêx o te mẽ kot amnhĩ jakarta pyræk. Jao te kot mẽ anê mẽ ate amnhĩ nhĩpêx tũm jakàr par pyræk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jejus kapêr kôt amnhĩ nhĩpêx ã mẽ apumunh kurê kumrêx.

¹² Tã na pu htem jarãhã mẽ pahte Tĩrtũm kôt amnhĩ nhĩpêx o papa hã amnhĩ jarênh kaxyw amnhĩ jakàr kêt nê. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jejus htyk nhũm mẽ kot haxàr nhũm nõi nhũm

mê pahte amnhĩ tomnujja ãhkô hã nõr nê hapêx par pyræk. Tã pu htem ra gôj rûm pahkrã hapôj. Te Tĩrtũm kot akupỹm Kris o htĩr pyræk. Jao ra mê pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrit.

¹³ Amnepêm kormã mê pahte Jejus kôt amnhĩ xunhwỳr kêt ri na pu prem ri amnhĩ tomnuj to nê tanhmã pajamxpêr punuj to ho ri papa. Tĩrtũm noo mã te ra mê pahtyk pyræk. Tã Tĩrtũm te akupỹm Kris kôt mê pahto pahtĩr pyræk o mê panhĩpêx nê mê panê mê pahte amnhĩ tomnuj piitã ho hapêx nê axte kãm hamaxpêr kêt kumrêx.

¹⁴ Te mê pahte tanhmã amnhĩ tomnuj to ho papa nhũm Tĩrtũm kot ja hã mê pahpumunh nê mê pahte amnhĩ tomnuj piitã hã kagà hpar pyræk. Nê kot kagàja pyr nê Kris nhĩhkô hã pĩ kahpa hã nhôr pyræk. Jao te kot mê pahte amnhĩ tomnuj ã kagàta hkaxônh nê rênh par pyræk o hipêx.

¹⁵ Hãmri nhũm Krisja pĩ kahpa hã htykja o mẽkarõmnuti mẽ mẽ õ pahĩ Satanasti wa mẽ ho hirerek pa. Jao hihtỳx o kot mẽ hakrenh par ã amnhĩ to amnhĩrit. Te mẽ kot kutã amnhĩ xunhwỳr xwỳnh piitã mẽ noo mã mẽ ho krihkrit par nê ma akupỹm õ krĩ hwỳr hkĩnh nê grer o mõrta pyræk.

¹⁶ Nê koja mẽmojaja mẽ awỳr mra nê tee ri mẽ ate mẽmoj kur o akrĩ hã mẽ apumu nê mẽ amã:

—Kwa na hte Tĩrtũm kôt mẽ kot amnhĩ xunhwỳr xwỳnhjaja ja kur kêt nê. Nê ja ho hkõm kêt nê. Nê mẽ panhõ arĩgromnu pê sap ã ri mẽmoj tã àpênh kêt nê. Nê mytwrỳ nyw ã mẽmoj tã àpênh kêt nê. Na htem ã Tĩrtũm ã hkĩnh o pa anê. Tã ã mẽ ate mẽ

ixkôt amnhĩ nhĩpêx anhÿr kêt jakamã mãn mẽ apê Tĩrtũm kra hkêt nà. Anê.

Tã nom kêr ka mẽ kapêr ma nê ãm ama.

¹⁷ Amnepê m kormã mẽ pahte Kris kôt amnhĩ xunhwÿr kêt ri na pu prem ã amnhĩ nhĩpêx anhÿr o papa. Tã Jejus kôt amnhĩ xunhwÿ hãmri nê axte ã amnhĩ nhĩpêx anhÿr kêt nê. Pãnhã kapêr pix ma nê hkôt pix mã amnhĩ nhĩpêx o ri papa.

Mẽ pahte mẽ kot Tĩrtũm kapêr o mẽ hêx xwÿnhjê mar kêt ã mẽ pamã karõ

¹⁸ Nê koja mẽmojaja mẽ awÿr mra nê hêx rom tanhmã mẽ amã amnhĩ jarênh to nê mẽ amã:

—Na pre Tĩrtũm ãm mẽ papxpix mẽ inhmã amnhĩ to amnhĩrĩt. Jakamã kwa mẽ ixkapêr ma. Kot kaj mẽ inhmar kêt nê hãmri nê mẽ amex kêt nê apa.

Anhÿr o mẽ amã kapêr japêr ka mẽ ama nê ãm mẽ ma. Rÿ nhũm mẽ amã:

—Tĩrtũm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwÿr to hkêt nê. Kot ka mẽ anê nhũm mẽ ama nê mẽ akamã gryk nê. No kêt mẽ amnhĩ to kapêr o wryk xwÿnhjê mãn wÿ. Koja mẽ ama nê mẽ akamã gryk kêt nê tanhmã mẽ amã mẽmoj nhĩpêx to. Anê.

Koja mẽ ã mẽ amã kapêr anê ka mẽ ama nê ãm mẽ ama. Te ho mẽ àhpumunh tÿx kãm mẽ kot ã mẽ amã kapêr anhÿr pyrãk no ãm mẽ kapêrja mex kêt. Na htem amnhĩ krã hkôt te amnhĩ to rax pyrãk o ã mẽ amã kapêr jao mẽ hamaxpêr tũm o hamaxpêr o ri pa. No mẽ apyrà nê mẽ hamaxpêr nyw o hamaxpêr kêt nê.

19 ãm mẽ kot Tĩrtũm kapêr kwỳm ri mẽ ahkre jakamã mẽ kêp Jejus kwỳ hkêt. No mẽ papajaja mẽ pahpê Jejus kwỳ na pu mẽ. Nhũm Jejus kêp mẽ panhõ Pahihti jakamã na hte tanhmã mẽ pahto paxihtỳx to pu htem kukwak ri tanhmã axpên to ajuta hto ho ri papa. Nê hkôt axpên to paxihtỳx o ri papa. Mẽ pahpiitã mẽ pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mẽ pahte amnhĩ krã hkôt tãm amnhĩ nhĩpêx kêt ã mẽ pajarênh

Karatas 3.1-5, 5.1-9; Epes 2.8; Piripos 3.9

20-21 Nê wam mẽ pahte amnhĩ nhĩpêx tũm nê mẽ pajamaxpêr tũmta te kot Kris kôt htyk nê mẽ pahpê hapêx par pyrãk jakamã na pu htem arĩ hkôt amnhĩ nhĩpêx kêt nê. Nê mẽkarõmnuti hkôt amnhĩ nhĩpêx kêt nê. Tã no nhũm xep ra mēhõja mẽ awỳr mō nê hêx rom mẽmoj nê tanhmã mẽ amã kapêr to nê mẽ amã:

—Kwa mẽ ja jamỳnh kêt nê. Nê ja hkur kêt nê. Nê ja kupênh kêt nê.

Anhỳr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhĩ nhĩpêx. Kwa nà mon ka mẽ ri axtem nê mẽ hkôt amnhĩ nhĩpêx?

22 Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwỳnhhta na htem kuku nhũm hapêx kurê kumrêx. Mō koja we Tĩrtũm omu nhũm kêp omnuj? Nà ja kot anhỳr kêt kênã. Mẽ ãm amnhĩ krã hkôt mẽ kot ja nê mẽ akurê.

23 Tã ã mẽmoj nê mẽ akurê anhÿr xwÿnhjaja na ka htem nhÿri mẽ omu nê mẽ kapêr ma nê atÿx ajamaxpêr o:

—Nà te Tĩrtũm kôt amnhĩ nhĩpêx mex o pa pyràk. Te mẽ àhpumunh tÿx pyràk o ã mẽ inhmã mẽmoj jarênh anê. Anê.

No ãm mẽ kot mẽmoj jarênhja kot anhÿr kêt. Æ mẽ kot amnhĩ nhĩpêx anhÿr xwÿnhjaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprÿ. Nê ãm htÿx Tĩrtũm kapêr o mẽ wrÿk xwÿnhjê hwÿr kaprÿ ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tĩrtũm akupÿm Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupÿm mẽ pahto mẽ pahtĩr pyràk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwÿr paxàpir nê kamã ri papa pyràk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyràk. Na pre akupÿm kaxkwa hwÿr api nê Tĩrtũm nhĩhkô hã mẽ ho amnhĩptàr xà kamã hkrĩ ho hkrĩ.

2-3 Nê ra mẽ pahte Kris kôt amnhĩ xunhwỳr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyræk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupỹm mẽ pahto mẽ pahtĩr xwỳnh. Koja nhỹrmã akupỹn mẽ pahwỳr wrỳ hãmri nhũm Tĩrtũm te ho mex raxta pyræk o mẽ panhĩpêx nê mẽ pahto mex rax kumrẽx.

Mẽ pahte akupỹm amnhĩ nhĩpêx tũm o paxujanãr kêt ã mẽ pamã karõ

Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrà nê axte kãm ajamaxpêr kêt nê.

Jakamã axte ri axpẽn mjên rỳ axpẽn prõ ho amnhĩkati hkêt nê.

Nê nhãm ri mẽmyjê hõ rỳ mẽnijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê. Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhỹr xwỳnhjaja Tĩrtũm kãm mẽ hprãm kêt. Koja nhỹrmã tanhmã ja hã mẽ homnuj tỳx to.

⁷ Amnepêm kormã mẽ ate Kris kôt amnhĩ xunhwỳr kêt ri na ka prem ã amnhĩ nhĩpêx anhỹr o ri apa.

⁸⁻⁹ Tã kêr ka mẽ axte ã amnhĩ nhĩpêx anhỹr kêt nê.

Nê mẽ ri axpên kãm agryk o ano hkà karôt o axpên pumunh kêt nê.

Nê mẽ axpên kamã axàhkurê hkêt nê. Ri tanhmã axpên tomnuj to ho apa hkêt nê.

Rỳ axpên jakwa kamã mẽmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê mẽ akapêr mã agêt o ri mẽ kãm akapêr kêt nê.

Nê mẽ ri mẽmoj to axpên mã axêx hkêt nê.

Ã mẽ ate amnhĩ nhĩpêx anhỹr tũmta ra mẽ apê hapêx par kênã.

Mẽ pahte amnhĩ nhĩpêx nyw kôt amnhĩ nhĩpêx ã mẽ pamã karõ

Rõmãn 12.2; Epes 4.23; Wam Pêtre 2.11

¹⁰ Nê na ka mẽ ra mẽ ate amnhĩ nhĩpêx nyw o amnhĩ nhĩpêx o ri apa. Jao ra mẽ pahto kator xwýnh maatija kôt amnhĩ nhĩpêx mex o mō. Kot kaj mẽ gaa nê rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

¹¹ Nê mẽ pahpê Kris kwýjaja ahpýnhã na pu mẽ. Na mẽ pakamã Ijaew nê Ijaew kêt xwýnhjaja. Nê mẽ pakamã panhĩ nê kupê. Nê mẽ kãm àpênh xwýnhjaja nê mẽ kot amnhĩ mã ri àpênh xwýnhjaja. ãm ahpýnhã mẽ pahpê Kris kwýjaja mẽ pahte anhỹr tã na hte Tĩrtũm tanhmã mẽ pakute hkôt mẽ pahpumunh kêt nê. Na hte mẽ panhĩpêx o axpên pyrã nê mẽ pahpiitã mẽ pakamã pa ho pa pu htem pahpimràatã hkôt ri amnhĩ nhĩpêx o papa.

¹² Nê Tĩrtũm kãm mẽ pajapê nê kãm mẽ pajapê xàj mẽ pakukamã amnhĩm mẽ parê. Mẽ pahte kãm tanhmã amnhĩ nhĩpêx to ho ri papa kaxyw mẽ pakukamã mẽ parê.

Jakamã kêr ka mẽ axpẽn kamã axukaprĩ ho ri axpẽn kôt apa.

Nẽ axpẽn to mex pix o ri axpẽn kôt apa.

Nẽ mẽ amã amnhĩ to rax o axpẽn jakrenh prãm kêt nẽ.

Nẽ mẽ ãm amnhĩ pix kukamã ri ajamaxpêr kêt nẽ. Amnhĩ mẽ nhãm mẽ hkukamã ajamaxpêr o ri apa.

Nẽ mẽ ri agryk tokyx anhỹr kêt nẽ.

¹³ Nẽ koja mẽhõ tanhmã mẽ ato ka mẽ amnhĩ tã omu nẽ tanhmã amnhĩ tã ho hkêt nẽ. ãm ja ho ajamakêtkati kurê kumrêx nẽ axte kãm ajamaxpêr o ri apa hkêt nẽ. Ra Jejus kot mẽ panê mẽ pahte amnhĩ tomnuj piitã rênh par kênã kot pu kêt mẽ amnhĩ tã tanhmã mẽhõ hto. Tã kêr ka mẽ axpẽn to mex o ri apa nẽ amnhĩ tã tanhmã axpẽn to ho ri apa hkêt nẽ.

¹⁴ E kêr ka mẽ ã axpẽn nhĩpêx anhỹr o ri apa. No ãm ja pix kêt. Nẽ mẽ mããnên amã axpẽn kĩnh pẽ axpẽn kutã anojarêt rãhã nẽ. Kot kaj mẽ ã amnhĩ nhĩpêx anẽ nẽ mããnên ra ixte mẽmoj tã mẽ amã karõta ka mẽ ho anhỹr mex kurê kumrêx. Mẽ pamã axpẽn kĩnhja na mex kumrêx o kot mẽmoj piitã hakrenh par.

¹⁵ Nẽ kêr ka mẽ Kris kukwak ri anhõxàhkre kaxwýnh kãm akĩnh nẽ ajamakêtkati nẽ tãm ri axpẽn nhĩpêx o ri axpẽn kôt apa. Te ixkre tipxi kamã mẽ ate axpẽn kôt ri amnhĩ nhĩpêx pyræk. ã mẽ pahte amnhĩ nhĩpêx anhỹr o papa kaxyw na pre Tĩrtũm amnhĩ wýr mẽ pahwý. Mẽ pahte hkôt amnhĩ xunhwýr kaxyw.

Nẽ kêr ka mẽ Tĩrtũm mã amnhĩ jarênh kaxyw nẽ kãm Kra Jejus ã akĩnh ã amnhĩ jarênh o ri apa.

Mê pahte Tirtûm mã mex ã pagrer ã mê pamã karõ

Epes 5.19

¹⁶ Nê kêr ka mê Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tirtûm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

¹⁷ Nê kêr ka mê Mêpahpãm Tirtûm mã amnhĩ jarênh o:

—Pa Tirtûm. Nà ãm hãmri na ka pre mê ixwÿr Akra Jejus mê nhũm mê ixwÿr wrÿ nê mê inhnê ty.

Anhÿr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rÿ ãm kôt pix mã tanhmã akapêr to ho ri apa.

Tanhmã mê pahte axpên nhĩpêx to hã mê pamã karõ

Epes 5.22-6.9

¹⁸ Nê mê anijaja. Tirtûm kot myja kumrêx nhĩpêx nê hkôt kãm hprõ nhĩpêx jakamã kêr ka mê amjên ã apijaàm o apa. Nê mê hamaxpêr mex ã mê omu nê mê hkôt ri amnhĩ nhĩpêx mex nê. ã mê ate amnhĩ nhĩpêxja na Tirtûm kãm hprãm.

¹⁹ Nê mê amyjaja kêr ka mê amã mê aprõ japê nê. Te amã amnhĩ tã ma pyræk o mê hipêx o ri apa. Jao tanhmã mê homnuj to hkêt nê.

²⁰ Nê mê apê mê hkrajaja kêr ka mê anhĩpêxà nê akatorxà wa hã apijaàm nê wa kapêr ma nê wa hkôt ri amnhĩ nhĩpêx. ã mê ate amnhĩ nhĩpêx

anhÿrja na Tirtũm kãm hprãm. Koja ã mẽ ate amnhĩ nhĩpêx anhÿr ã mẽ apumu nê hkĩnh nê.

²¹ Nê kêr ka mẽ apê mẽ hipêêxà nê mẽ katorxà mẽ akra gryk kaxyw mẽ kãm apêr o apikênh kêt nê. Kot kaj mẽ ã mẽ hipêx anê nhũm mẽ tee ri amnhĩ tã mẽ ama nê hkaprĩ nê.

²² Nê mẽ ate mẽ kãm tanhmã amnhĩ nhĩpêx to ho ri mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx. Nê mẽ noo mã mẽ kãm tanhmã amnhĩ nhĩpêx mex to nê mããnên mẽ wa kre kamã mẽ kãm tanhmã amnhĩ nhĩpêx mex to. Nom mẽ kot axàpênh ã apumunh nê hã kãm akĩnh pix kaxyw axàpênh mex kêt nê. Mããnên mẽ amã Pahihti Kris kĩnh ã akatàt kôt mẽ kãm mẽmoj tã axàpênh mex nê. Mẽ noo mã nê mããnên mẽ wakre kamã.

²³ Nê mẽ akĩnh kãm mẽ kãm axàpênh mex o ri apa. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nê tãm amnhĩ nhĩpêx o tãm mẽ kãm axàpênh mex o ri apa.

²⁴ Te mẽ anhõ patrãw pix mã axàpênh pyræk nom kumã pix mã hkêt. Mããnên mẽ panhõ Pahihti Krisja mã. Jakamã kot kaj mẽ ã amnhĩ kaxyw Tirtũm mã ajamaxpêr pê akĩnh kãm anhõ patrãw mã mẽmoj tã apê nhũm Pahihtija ja hã mẽ apumu nê nhÿrmã mẽ ato mex rax nê.

²⁵ E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwÿm amnhĩ krã hkôt ri tanhmã amnhĩ nhĩpêx to nhũm Tirtũm tee ri ja hã mẽ apumu hãmri nê nhÿrmã tanhmã hã mẽ anhĩpêx to. Na hte ã mẽ kot amnhĩ tomnuj xwÿnhjê piitã mẽ hipêx anê nê mẽ hipêx o

axpên pyràk. Jakamã kwa kêr ka mẽ anhõ patrãw mã axâpênh mex rãhã ho ri apa.

4

¹ Nê mẽ apê mẽ õ patrãw kêr ka mẽ kot mẽ amã mẽ àpênh xwýnhjê ho mex nê tanhmã mẽ homnuj to hkêt nê. Mẽ uràk nê kaxkwa kamã mẽ anhõ Patrãw maatija hkrĩ. Kot mẽ pahte tanhmã amnhĩ nhĩpêx to nê tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhỹr o ri apa.

Mẽ pahte Tĩrtũm mã amnhĩ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

² Nê kêr ka mẽ xatã Tĩrtũm mã amnhĩ jarênh rãhã ho ri apa. Nê tanhmã mēhõ kot amnhĩ nhĩpêx to hã harênh ma nê ho Tĩrtũm wý. Nê mẽ ate kãm amnhĩ jarênh kamã kãm mex o mex ã harê.

³⁻⁴ Nê mãânên ixto awý kê mẽ tokyx ixkator japêr. Pa ixãmnhĩx mẽ kot kormã Kris jarênh mar kêt xwýnhjê mã harênh o ri mẽ hkôt ixpa. ã ixte amnhĩ nhĩpêx anhỹrta ã na prem ixpynê nê ijaxà pa kormã jar ixkrĩ. Jakamã kwa mẽ mãmrĩ ja hã ixto Tĩrtũm wýr o apa.

Mẽ pahte apkati mẽ mẽ pahkwýjê mã Jejus jarênh ã mẽ pamã karõ

Epes 5.16

⁵ Nê kêr ka mẽ kêp Kris kwý hkêt xwýnhjê hkôt nhỹhỹm ri apa nê tãm ri Tĩrtũm kapêr kôt amnhĩ nhĩpêx o mẽ hkôt ri apa.

⁶ Nē kê mēhō awỳr tē nē tanhmã Jejus ã akukjêr to ka amã hkĩnh ã aprĩ hã kãm awjarē. Ahpỹnhã tanhmã mẽ kot hã akukjêr to xà hkôt tanhmã mẽ kãm harēnh to kê mēhprĩ hã mar mex nē.

Pawre kot Koros wỳr Xikitre mẽ Ones wa mẽnh ã harēnh

Epes 6.21-22

⁷⁻⁸ Nē ot pa mẽ awỳr mẽ pahtō Xikitre mẽnh mã. Kot ma mẽ awỳr ixte mẽ amã ixkapêr ã kagà nhĩpêx o mōr kaxyw. Na hte ixkôt Tĩrtũm mã amnhĩ nhĩpêx o ri pa. Inhmã hapêê. Tã kot paj mẽ awỳr kumē kê ma mẽ awỳr mō nē hprĩ hã mẽ amã ijarē. Mē ate ijarēnh mar nē tãm ajamaxpêr nē akĩnh kaxyw.

⁹ Mē akwỳ Onesti hkôt koja ma mẽ awỳr mō. Mãănēn Kris kôt kêp mẽ pahtō hã mẽ pamã hapê xwỳnh na. Na hte Tĩrtũm kapêr kôt amnhĩ nhĩpêx mex rãhã ho ri pa. Tã Xikitre mẽ koja wa ma mẽ awỳr mō. Hãmri nē mẽ awỳr pøj nē jar tanhmã mẽ ixte amnhĩ nhĩpêx to hã mẽ ijarē ka mẽ ama.

Kris kôt mẽ hkwy kot mẽ hwỳr hpêr mẽnh ã mẽ harēnh

¹⁰ Nē ota Aristakja ixpyrà nē kêp prês nē hkrĩ. Tã mẽ awỳr hpêr mẽ. Nē Panãpe htō Juãw Makreja mãănēn mẽ awỳr hpêr mẽ. Na pa pre ra mẽ amã Juãw Makre jarē. Tã koja mẽmo arĩgro hã akupỹn mẽ awỳr mōr japêr ka mẽ omu nē ho mex nē.

¹¹ Nē Jejus Justija mãănēn mẽ awỳr hpêr mẽ. Jajaja mẽ ixpyrà nē kêp Ijaew. Tã mẽ tapxipixjaja na htem ixpyrà nē mẽ ixpê Ijaew kwỳjê rom mẽ kãm Tĩrtũm kapêr nyw o mẽ ahkre ho ri mẽ hkôt pa. Tĩrtũm kot Kra Kris kôt mẽ kot amnhĩ xunhwỳr

xwỳnhjê ho hkra hã harênh nywja na htem mẽ kãm harênh o ri mẽ hkôt pa. Pa ja hã mẽ omu nê ixkĩnh nê.

¹² Nê mẽ anhĩõ Epasja mããnên mẽ awỳr hpêr mẽ. Na hte Jejus Kris mã tanhmã amnhĩ nhĩpêx mex to ho pa. Nê mẽ ato Tĩrtũm wỳr rãhã ho pa nê mẽ ato hwỳr o:

—Pa Tĩrtũm. E kwa tanhmã Koros kamã akrajê ho kê mẽ akôt amnhĩ xunhwỳr tỳx nê. Nê amã hprãm xà hkôt pix mã amnhĩ nhĩpêx o ri pa. Nê amnhĩ kaxyw Kris kôt pix mã hamaxpêr tỳx rãhã nê. Anê.

¹³ ãm hãmri na hte mẽ ato hwỳr o pa. Nom mẽ kapxipix o hwỳr kêt nê. Mããnên krĩ pê Ratisej kamã nê krĩ pê Jerop kamã Kris kôt mẽ pahtôjê ho hwỳr o ri pa. Mẽ ate Tĩrtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mẽ pahtô tôtô Rukre mẽ Tẽmtija wa mããnên mẽ awỳr hpêr mẽ. Tôtô Rukreja kêp ixkràmnhwỳ mex na.

¹⁵ Nê kêr ka mẽ krĩ pê Ratisej kamã Kris kôt mẽ pahkwỳjê mã ijarê. Nê Nĩpare mã nê ôrkwỳ hwỳr mẽ pikuprõnh nê Tĩrtũm mã mex o mex ã harênh o mẽ hkrĩ xwỳnhjê mã mããnên ijarê.

¹⁶ Nê e kêr ka mẽ ixte mẽ awỳr kagà mênhja kamã harênh pa nê hpãnhã krĩ pê Ratisej kamã Kris kôt mẽ pahkwỳjê hwỳr amê kê mẽ apyrà nê kamã harê nê piitã kuma. Nê mẽ kãm anê kê ra ixte mẽ hwỳr kagà mênh xwỳnhhta kê mẽ amã kugõ ka mẽ kuxwar kamã harê nê ama.

¹⁷ Nê kêr ka mẽ Akip mã ijarê kê ra Tĩrtũm kot kãm mẽmoj tã karõ xwỳnhhta kê ho anhỹr jatur xàm

kumē. Kêp hkra hã kê tãm kãm àpênh jatur xàm kumē.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mě ate ixte mẽmoj tã kagà pumunh nẽ hkôt inhmã ajamxpêr kaxyw. Nẽ ixte mẽ awÿr mẽnh ã ijarênh mar kaxyw. Kwa kêr ka mẽ arĩ ixpê prês ã ixto Tĩrtũm wÿr rãhã ho ri apa.

E kê Tĩrtũmja mẽmoj to mẽ akutã nojarêr nẽ mẽ ato mex nẽ ka mẽ amex nẽ ajamakêtkati nẽ apa ho apa. Tã ãm ja pix. Ixpê Pawre na pa mẽ awÿr kagàja nhĩpêx nẽ ã mẽ awÿr mẽnh anẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f